

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN
DARIPADA : TUAN HEE LOY SIAN
[PETALING JAYA SELATAN]
TARIKH : 30.3.2017 (KHAMIS)

Tuan Hee Loy Sian [Petaling Jaya Selatan] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan usaha untuk mengurangkan penggunaan beg plastik dalam usaha memulihara alam sekitar seperti yang dijalankan oleh Kerajaan Negeri Selangor.

JAWAPAN:

Tuan Yang Di-Pertua,

Kerajaan sentiasa berusaha untuk menyediakan persekitaran yang bersih dan selamat kepada semua lapisan masyarakat. Fokus jangka panjang kerajaan adalah supaya rakyat dapat hidup dalam keadaan yang selesa dan mempunyai kualiti hidup yang lebih baik tanpa menggugat keperluan generasi akan datang. Salah satu daripada usaha kerajaan dalam meminimumkan penggunaan sumber asli, bahan toksik dan pengeluaran bahan buangan adalah dengan mengurangkan penggunaan beg plastik di kalangan masyarakat.

Di antara langkah-langkah untuk mengurangkan penggunaan beg plastik adalah dengan melaksanakan Kempen Kurangkan Penggunaan Beg Plastik. Kempen ini dijalankan oleh pihak pasaraya di mana tiada beg plastik dibekalkan secara percuma kepada pelanggan pada setiap hari Sabtu. Kempen ini dilaksanakan bagi mewujudkan kesedaran orang ramai tentang kepentingan menjaga alam sekitar. Ia juga adalah sebahagian daripada usaha Kerajaan dalam memperkasakan hak pengguna untuk mendapat alam sekitar yang sihat dan selamat.

Tuan Yang Di-Pertua,

Langkah ini diambil bagi mengurangkan jumlah penggunaan beg plastik memandangkan bahan plastik mengambil masa lebih kurang 100 tahun untuk terurai. Pelupusan bahan plastik juga membebaskan gas karbon dioksida dan gas-gas lain yang menyumbang kepada kesan rumah hijau dan seterusnya memberi kesan buruk kepada alam sekitar.

Melalui pelaksanaan kempen ini, Kementerian berharap pengguna akan menjadikan budaya bebas plastik sebagai cara hidup dalam memelihara alam sekitar yang sihat dan selamat.

PARLIMEN MALAYSIA
PEMBERITAHU PERTANYAAN DEWAN RAKYAT

PERTANYAAN : Lisan

DARIPADA : Datuk Raime Bin Unggi [Tenom]

TARIKH : 30 Mac 2017 (Khamis)

**SOALAN : Datuk Raime Bin Unggi [Tenom] minta
MENTERI PERTANIAN DAN INDUSTRI
ASAS TANI menyatakan apakah usaha
pihak Kementerian untuk meningkatkan
sektor pertanian dan ternakan kepada kaum
petani dan penternak khususnya di Parlimen
Tenom.**

JAWAPAN

Tuan Yang Dipertua,

Kementerian Pertanian dan Industri Asas Tani melalui Jabatan Pertanian (DOA) Sabah dan Jabatan Perkhidmatan Haiwan dan Perusahaan Ternak (JPHPT) Sabah telah melaksanakan pelbagai usaha bagi meningkatkan sektor pertanian dan penternakan di Parlimen Tenom. Beberapa projek pembangunan pertanian dan penternakan yang telah dilaksanakan adalah seperti berikut :

- a) Program pembangunan masyarakat tani bertujuan untuk memberi latihan dari segi pengetahuan dan kemahiran kepada para petani sama ada dalam bidang perladangan atau pemprosesan hasil pertanian. Dalam RMKe-10 (tahun 2011-2015 sebanyak 108 kursus telah dilaksanakan melibatkan 4,239 orang petani dalam bidang pemprosesan makanan manakala dalam bidang perladangan seramai 613 orang petani telah mengikuti kursus yang dianjurkan oleh Pusat Latihan Petani, Tenom;
- b) Pemulihan tanah terbiar melibatkan tanaman padi di kawasan seluas 422.61 hektar dengan penglibatan petani seramai 262 orang daripada 7 buah kampung di daerah Tenom;
- c) Pelaksanaan projek tanaman buah-buahan seperti limau pomelo, betik sekaki, durian, manggis, jambu batu, avokado,

duku langsung, langsung, dokong, durian belanda dan jambu air melibatkan kawasan seluas 566 hektar dengan bilangan petani seramai 312 orang daripada 17 buah kampung di daerah Tenom;

- d) Tanaman industri juga diberi tumpuan iaitu bagi penanaman kopi *Robusta* yang melibatkan kawasan seluas 80 hektar dengan penyertaan 142 orang petani;
- e) Tanaman singkat masa seperti sayur-sayuran, jagung manis dan pisang Sabah juga dilaksanakan melibatkan 6 orang petani dengan kawasan seluas 9 hektar;
- f) Dalam aspek penternakan, pendedahan diberikan kepada para penternak yang layak berkenaan projek-projek seperti Pawah Kambing serta Bantuan Menternak Kerbau/Lembu dan lain-lain yang dilaksanakan oleh Jabatan Perkhidmatan Haiwan dan Perusahaan Ternak (JPHPT) Sabah.
- g) Melalui Projek Lembu Tenusu yang dijalankan, daerah Tenom kini penyumbang kedua terbesar bagi pengeluaran susu lembu di Sabah. Kawasan ini kini mengeluarkan hampir sejuta liter susu setiap tahun. Pada tahun 2016, Tenom telah berjaya mengeluarkan 10.8% daripada keseluruhan pengeluaran susu lembu dalam negeri Sabah; dan

h) Projek Kambing Tenusu di bawah RMKe-11. Pada tahun 2017, seramai 10 orang penternak yang layak akan dipilih untuk diberi latihan dan seterusnya menyertai projek kambing tenusu yang telah diperkenalkan di Sabah. Jabatan mensasarkan seramai 50 orang penternak kambing tenusu untuk dibimbing menjelang tahun 2020.